

**Le Restablissement,**  
 & celebration de la Saincte Messe,  
 & service de Dieu, selon l'Eglise Ca-  
 tholique Apostolique Romaine:  
 en la ville de la Rochelle. Et ladicte  
 Celebration faicte par Monsei-  
 gneur le Reuerendissime Euesque  
 de Xaintes: le Dimanche huitiesme  
 d'Aoust. 1599.

*Suyuant l'Edit, & expres commandement du tres-  
 Chrestien Roy de France & de Navarre  
 Henry quatriesme.*



**A PARIS,**  
 Chez DENYS BINET, en la Court de Bauierie  
 pres la porte Saint Marcel.

33



**DV RESTABLISSEMENT**  
*du service de Dieu, & Celebration de la  
 Sainte Messe en la ville de la Rochelle,  
 selon l'Edict du Roy tres-Chrestien no-  
 stre Sire, & par son expres commande-  
 ment. Et ladicte Celebration faicte par  
 Monseigneur Reuerendissime l'Euesque  
 de Xainctes.*

**D**IEU estât courroucé con-  
 tre son peuple, dict ainsi,  
 peuple François Catholi-  
 que. Apres que ie t'auray  
 visitée fille de Sion, & que tu seras hu-  
 miliée deuant moy, lors ie rcuiendray  
 à toy & te consolera: & te feray cōme  
 es iours anciens, & seras deliurée de  
 tous ceux qui t'affligent.

Par ceste sentēce du Prophete, Dieu  
 nous monstre que les maux que nous

endurõs prouiennent de nostre faute  
 meisme. Et que la bõne volõté de Dieu  
 est tousiours disposée enuers nous : si  
 nous nous humilions comme il ap-  
 partient, & si nous implorons sa mi-  
 sericorde.

Ce faisant il nous prom et de nous  
 restablir en nostre liberté premiere, &  
 de nous deliurer de to<sup>9</sup> empeschemés.

D'ailleurs aussi il nous dict, qu'il cõ-  
 uertira les cœurs de ceux qui nous sõt  
 aduersaires, & les inclinera à nous biẽ  
 faire.

Comme ainsi soit donc que la Fran-  
 ce à enduré de grands tourments par  
 les guerres passées: le plus grand a esté  
 celuy de la conscience, quand on est  
 empesché de seruir Dieu librement.

Or cest empeschement là ayant esté  
 commun presque à toute la Frãce, çà  
 esté principalemēt aux lieux desquels  
 le seruice de Dieu auoit esté osté par  
 animositez nées & prouenuës de la

diuersité des opinions nouvelles.

Tellement que les voyfins estoient chassez les vns par les autres de leurs maisons, pour estre mis chacun cōme en exil au milieu mesme de sa patrie. Et a esté laigreur telle, que iamais la guerre de la Morée, dictē Pelopōnese entre les Grecs: dont parle Thucydide, & qui dura 22. ans, ne fut si irreconciliable: que ceste miserable diuisiō s'est monstrée iusques icy depuis tantost quarante ans, que les premiers re-  
meumens commencerent.

Entre autres lieux & places la ville de la Rochelle, a esté depuis l'an 1567. en ceste calamité continuelle, & combien que quelque fois il y ait eu des interualles, neātmoins tousiours l'impression violente a demeuré en la fantasie de plusieurs, qui ayans leurs volontez vlcérées, & s'estans eux mesmes laissez enuelopper en l'interest des passions estrangeres, n'ont pas peu si-

toft reuenir d'une telle esmotion à quelque tranquillité d'une discretion Chrestienne, & d'un iugemēt rassis de la cōsideration de leur propre misere.

Et à tant duré ce transport de leur raison en aigreurs & amertumes, que sans la prouidence de Dieu qui à benit les labours du Roy tres-Chrestien nostre Sire, pour obtenir de sa grace le don bien-heureux de paix, par les larmes continuelles, & les prieres arden-tes de nostre Sainct Pere Clemēt viij. seant à present au Siege de verité, en la Chaire Apostolique de Sainct Pierre Prince des Apostres, duquel il est vray & legitime successeur, & tenant sa place, nous represente nostre Seigneur Ie-sus-Christ, mesme au milieu de l'Egli-se son espouse vnique, qui n'abandon-nera iamais: sans vne telle faueur diui-ne, par les labours de sa Majesté & son tres-Chrestien zele, nous fussions en-core à nous entremanger: comme

les Anthropophages, exerçans toutes les sortes d'inhumanitez que iamais ayent faiçt les Sauvages, les vns contre les autres.

Mais Dieu à tellement touché le cœur de sa Majesté, que son principal but est, que durant son regne Dieu soit seruy & adoré, & sa saincté Eglise reuerée. A ces fins, apres auoir departy à ses subjects le benefice singulier de la paix : il à aussi par mesme moyen tousiours procuré le rétablissement du diuin seruice : par tous les lieux où il estoit par la malice des temps empesché iusques à present.

Singulierement sçachant par certaines experiences, que sa ville de la Rochelle importoit d'un grad exemple enuers tous en ceste part : ç'à esté par icelle que sa Majesté à voulu faire voir par expres, quelle estoit sa volonté pour tous autres.

Et à ceste fin ayant choisi d'entre

Messieurs de son Conseil, l'un d'iceux  
 ses seruiteurs tres-fideles, Monsieur  
 l'Anglois Maistre des Requestes, or-  
 dinaire de son Hostel, cy deuant Pre-  
 uost des Marchans de la bonne ville  
 de Paris : Sa Majesté l'auroit enuoyé  
 vers ladicte ville de la Rochelle, avec  
 ample pouuoir & commission. Apres  
 que Messieurs de la Rochelle eux-mes-  
 mes auroyent de ce, plusieurs fois sup-  
 plié sa Majesté pour ce faire, avec tres-  
 humbles requestes, qu'ils luy en au-  
 royent presentées.

Iceluy dōc partāt de Paris, dès la fin  
 du mois de Iuin dernier, arriua à la Ro-  
 chelle en Iuillet, & y fut receu fort ho-  
 norablement par Messieurs de ladicte  
 ville : avec toutes les submissions re-  
 quises enuers tous les fidelles subjects  
 de sa Majesté comme ils sont, ayant  
 mesme eu ceste faueur & honneur de  
 la residence de sa Majesté en ladicte  
 ville pour vn temps, durant les prece-



dentes miserables. Et ayant receu de sa Majesté plusieurs grands biens-faits.

Et apres auoir entendu dudit Sieur l'Anglois la cause de sa venuë, & intention de sa Majesté : par vn commun consentement ils se disposent à luy redre l'obeyssance deuë à ses commandemens.

Suyuant ceste resolution prise en la Maison de ville avec tous les officiers du Roy, il fut deliberé en donner aduis à Monseigneur le Reuerendissime Euesque de Xainctes. D'autant que la Rochelle est de son Diocese. Lequel suyuant son deuoir, & comme il est remply d'vn zele singulier au restablissement de l'honneur & seruice de Dieu par tous les lieux de son Diocese s'y achemina sur la fin de Iuillet.

Il fut assisté de Reuerend Pere en Dieu Monsieur de saint Martin de Randan, Seigneur du tout rauy, pour l'aduancement & exaltation de no-

stre mere sainte Eglise Catholique Apostolique & Romaine , lequel y a tousiours demeuré iusques à la fin.

Et d'autant que toutes les Eglises de la Rochelle , pour le temps present estoient ruynées par les calamitez des guerres, où profanées. Ledit Seigneur Euesque delibera de reconcilier deux d'icelles Eglises particulièrement , qui furent trouuées les plus commodes par l'aduis de tous , & les moins subjectes aux inconueniens de quelque occasion de murmure populaire, selon qu'il y peut auoir de petites gens d'esprit boüillant & inconsiderez.

Ces deux Eglises furent l'Eglise de Saint Berthelemy, & l'Eglise de Sainte Marguerite au costé de la ville, qui est deuers la terre : parce mesme que deuers l'autre costé y auoit eu beaucoup d'empeschemens aux places des Eglises estants occupées par les pie-

ces d'Artillerie, & autre choses necessaires à la marine.

Ceste reconciliation faicte bien & deuëment, & avec vne grande affluence de peuple: y assistans aussi plusieurs de la nouvelle opinion, lesquels en receurent vn singulier contentement, & s'en admirerent ( Car pour dire ce cy en passant, les opinions nouvelles n'ont iamais faict que desguiser les matieres) Lors finallemēt ledict Sieur Euesque Reuerendissime celebra la Saincte Messe *In Pontificalibus*, dans ladicte Eglise de Sainct Barthelemy assisté dudiect Sieur de Sainct Martin de Randan, & vn grand nombre de gens d'Eglise, qu'il auoit amenez avec luy. Ce fut le huietieme iour d'Aoust dernier.

Et ce avec vne grande quantité de monde pieux & deuot, rendans graces à Dieu d'vne ioye incroyable: de ce voir à vn iour si heureux d'vne so-

lemnité si long temps attenduë, & qui n'estoit presque plus esperée.

Au mesme iour il y eut aussi celebration de la Sainte Messe dans l'Eglise de Sainte Marguerite, par l'un de Messieurs les grands Vicaires du dict Seigneur Reuerendissime Euesque.

Et d'autât qu'il y escheoit faire procession, ledict Sieur alla de Saint Berthelemy à Sainte Marguerite, & ceux de sainte Marguerite à Saint Berthelemy par diuerses ruës, pour ne se s'entre-rencontrer: & ainsi retournerent les vns par la voye des autres, avec vn grand & notable silence & admiration de plusieurs, qu'ils auoiët mal imbus depuis trente ans des ceremonies de l'Eglise.

L'apresdinée y eut vn tres-docte Sermon par Monsieur le Curé de Marennes, Prédicateur fameux, & plein d'un Saint zele: qui exhorta le peu-

ple Chrestienement, à recognoistre la bonté diuine, & à implorer la sainte grace, pour la continuation d'un si grand bien.

Priant Dieu aussi pour le Roy, afin que Dieu le maintienne & augmente en toute prosperité, avec un tel si S. desir de l'auancement & exaltation de la sainte foy Catholique Apostolique & Romaine.

Toute la sepmaine, les deuotions du peuple ne furent moindres, y estant un chacun animé d'une grâde ferueur d'esprit, par la grace de Dieu. Mesmement pour la nouveauté, plusieurs qui n'y auoyent pas beaucoup d'affection auparauant: peu à peu, par la grace de Dieu, s'y rangerent.

Le Dimanche ensuyuant, Mondict Seigneur Reuerendissime continua le saint seruire, & fut fait comme auparauant: mesmement pour la solennité de l'Assumption de nostre

Dame , dont il y eut vne demonſtration plus grande , de la ioye commune de tous.

Et ſemblablement l'apresdinée fut faicte predication , par Monſieur Guſtault, Prieur Curé de Surgeres , avec vne grande edificatiõ de tout le peuple : Il y auoit plus de cinq mille perſonnes tous bons Catholiques.

Et ainſi continué le ſainct ſeruiſe de Dieu dans la ville , par l'ordre que ledict Sieur Eueſque y à laiſſé , eſtant allé avec ledit Sieur l'Angloys aux autres villes de ſon Diocèſe, où eſt neceſſaire ledict reſtabliſſement , ſuyuant l'intention de ſa Maieſté : à l'honneur de Dieu, & à la conſolation de tous les bons Catholiques.



